

靜

志

居

詩

話

靜志居詩話卷十九

秀水朱竹垞先生著

扶荔山房編輯

魏學洵字子敬嘉善人贈太常卿大中子鄉人私
諡孝烈先生有茆簷集

魏忠節公被逮日天大雷電子敬徒跣攀號請隨行公
語之曰覆巢豈有完卵父子竝死無益也子敬乃微服
緹騎後探起居抵國門邏卒四布乃變姓名匿都市營
救不可得公既斃獄扶柩歸朝夕躡踊未嘗一入寢室
淚盡脣焦家人捧水漿以進却之日吾父詔獄中孰夜

半而進之漿者病且革進以藥則又却之曰吾父詔獄
中孰診視而進之藥者歷數旬而哀毀死矣思陵卽阼
朝士上聞于朝以是海內稱爲孝子大學士同里錢公
士升序其集云子敬之志父存則不獨死父死則不獨
生是誠孝子之知己矣當甲子秋忠節掌吏垣以激濁
揚清爲己任天下仰望太平子敬獨私憂之歎曰無根
之草其能久乎物不可以終通天殆蘊隆正人之毒而
速之憾也未朞而禍作人服其識猛虎行云北山有猛
虎不牝亦不牡哀哀無辜人吞噬十而九猛虎且勿道

蝨乃伏其尻壯士困顛躓蝨喙紛相撓爲語行路人且
復忍此蝨撲蝨誤驚虎滅影苦無術虎頭置短枕虎皮
置塵埃猛虎有死日蝨乎何有哉

王屋字孝峙初名畹字蘭九嘉善人有學可齋詩

箋

孝峙以詩受知魏忠節因與忠節一門羣從和酬詩類
劉改之詞學辛幼安嘗過同里曹學士齋學士曰先生
尙能著屐遠步邪應曰有太史公不可無牛馬走鄉里
傳爲新語子夜歌三首云千金買良玉百金求良工爲

儂作雙環相連無始終妾身妾自惜君心君自知莫將
日後情不如初見時家有千黃金不如得郎心家有千
倉穀不如抱郎宿

陸寶字敬身鄞縣人官內閣中書有霜鏡集

敬身近體好用語助辭不無狂於公安景陵之習然其
才氣奔逸勝葛震甫陳仲醇且十倍近李處士杲堂輯
甬上耆舊詩凡四百三十人三千餘首自詡搜隱獲奇
而敬身曾與余太常君屠儀部緯真楊處士伯翼識
面卜鄰者乃獨遺之何與相公來云相公來合軍驚千

夫執爨除道郊迎相公下車命長揖口雖不言心內泣
伍符尺籍新有名鶴入雞羣從自及昔時上直何壯哉
呵聲百口迅如雷行者止立坐者起沙堤如拭大車來
一朝禍至棲叢棘不賜屬鏤猶主德阜帽騎驢出國門
東海東頭聊假息秋高汎撤問歸船手挈行囊只半肩
富貴如雲真大夢胡椒鍾乳在誰邊

趙宦光字凡夫吳人有寒山雜著

凡夫以篆書名略用草書體書之號曰草篆紺園琳觀
精舍名園咸乞其書題扁所撰說文長箋一時紙貴然

自解人觀之未有不齒冷也古之小學書數方名字或不正童子皆知之自周秦及漢無不識字之學生其後大小二篆生八分三真六草諸體雜出古法未盡亡者賴有許叔重說文一編自一至亥本之倉頡追譜以四聲說文亡矣顧野王玉篇其文多於叔重孫強又增益之追題以大廣益而玉篇亦亡矣蓋書之最古者莫如篆學野王雜以隸書已失其舊李陽冰刊定說文頗出私意詆訶許氏學者已恨之凡夫草篆其又何所本乎世人一遵晦菴朱子之說以灑掃應對進退爲小學書

數方名槩置不講無怪乎小學放絕篆法日微可歎也
已凡夫饒於財卜築城西寒山之麓淘洗泥沙俾山骨
畢露高下泉流凡游於吳者靡不造廬談讌廣爲樂方
特於韻語遜其鄉里

朱鷺初名家棟字白民舉人有青浮子額籟

白民負奇嘗獨游黃山遠尋嵩華所至畫竹以自給家
居撰建文書法擬思進呈請復革除紀年不果崇禎初
騎驢入都上所作甘露頌又不果歸結茅於郡西華山
蓮子峰下躬親井臼不願見貴人年八十餘乃卒是時

隱居者王在公芥菴趙宦光凡夫時稱吳下三高而敦
古節者白民爲最文文肅特志其墓

周應儀字元度吳江人光祿寺署丞有南北游草
元度絕句小詩極其纏綿溫麗爛溪二絕云明月溪邊
路秋風溪上船船頭何所有滿把水中蓮我家爛溪邊
出門卽溪水秋來溪水深處處菱歌起夏日云風荻蕭
蕭日欲斜水邨無處不荷花遙看白鷺忽飛去占斷柳
陰一片沙聞歌云桃花扇底落紛紛宛轉清歌一曲聞
醉殺文園渴司馬酒壚斜盼卓文君

張志遠字叔明嘉興人有竹嶼吟藁

叔明隱於市廛詩爲李九疑太僕所賞句如沙崩樵徑
斷水澗野橋危香吹新竹粉翠惜小荷錢太僕稱其清
淳穩順不誣也

殷仲春字方叔秀水人有棲老堂集

方叔躬耕永樂南邨陳仲醇贈詩却羨白頭殷處士鵝
鳴聲裏獨耕田是也家居社南諸弟分處郭西之竹橋
方叔葭牆茅屋不蔽風雪慕王績爲人亦自號東臯子
以醫爲業得錢卽入市買斷爛書讀之念浮屠道士之

撰述皆編入藏乃盡收醫書著錄號爲醫藏岐黃家以爲總龜焉方叔以天啓辛酉卒仲醇志其墓

周楨字伯知吳江人有不夜齋詩藁

伯知性最緩嘗與其弟同舟宿有偷兒挾牕入竊其篋伯知審視不語比其弟覺訶之偷兒踉蹌出伯知徐曰吾欲靜觀其如何脫身奈何使彼狼狽而返鄉人傳以爲笑其詩流便而乏警策由其懶於推敲也

陳衍字磐生閩縣人有大江集

磐生與徐興公同入曹能始聞風樓詩社而賦才懦鈍

光燄鬱而不舒其自序比於春草蔓生秋蟲孤響良亦
自得之言十不願辭云不願化天上月那得盈盈長不
缺不願化天上星白日一照不分明不願化土中石受
人踐踏無人惜不願化水中灘十步上來九步難不願
化牕前鏡十日不磨光不瑩不願化沉水香煎熬燒灼
心摧傷不願化郎馬鞭下馬將他壁後懸不願化白紵
扇顛倒要他遮郎面不願化錦鴛鴦未必雌雄守得長
不願化楊柳花隨風飄蕩落誰家

吳爲霖字景傳無錫人有白賁集

景傳詩如集場墟市骨董斑駁陸離卽而視之一錢不值

又云景傳客自澄江歸有贈詩云浮遠堂前路微風穩
放舟江昏茶磨雨烟暝弩臺秋入饌花雞脆開封綠蟻
浮西澹十八里來往候潮頭按浮遠堂在君山宋紹興
中建淳熙間李鶴田珏爲江陰司法題柱聯云此水自
當兵十萬昔人曾有客三千羅春伯點題名云淳熙丁
未九月旣望同侯叔平等九人登君山夕陽在波帆影
散亂平淮千里去鴈無極蒼然暮色自遠而至須臾月

出東山之上江水湛然風露清美不知在人間世也

張丑字青父長洲人

青父精於鑒古所撰清河書畫舫真蹟日錄時人比之黃伯思周公瑾詩草無傳亦有節度墨皇齋卽事云用拙經營少居閒興趣長閱書宗海岳展畫得瀟湘玩世歌漁父陶情付索郎向平昏嫁畢白首杖桃榔

王彥泓字次回金壇人

儒學

有疑雨集

風懷之作段柯古紅樓集不可得見矣存者玉溪生最擅場韓冬郎次之由其絨情不露用事豔逸造語新柔

令讀之者喚奈何所以擅絕也後之爲豔體者言之惟恐不盡詩焉得工故必琴瑟鐘鼓之樂少而寤寐反側之情多然後可以追韓軼李金沙王次回結撰深得唐人遺意起句如雨下春泥月下霜幾年辛苦是蕭郎一層芳樹一層樓只隔歡娛不隔愁月到西南倍可憐照人雙笑影娟娟中聯如燒燈院落更衣影聽曲簾櫳點屐聲當初語笑渾閒事向後思量盡可憐畫舫簾衣凭雪滿玉箏絃索見春蔥明明可愛人如月漠漠難尋路隔烟臨水偶來同倚檻隔花何路可登樓封來淚點紅

猶溼翦後香絲綠未齊繡佛像前同下拜泥金經尾獨
僉名含毫愛學簪花格展畫慙看出浴圖花下小樓堆
燭淚柳邊低舫載茶烟翻成繡譜傳人畫會得琴心允
客挑牕下有時思夢笑燈前長不卸頭眠結句如水國
不生紅豆子贈君何物助相思殘陽欲度梅梢盡纔向
紅牕拂鏡奩蠟照漸微香燧冷珮聲纔達畫堂東闌干
一曲無多地才著思量便渺然仙家合住烟霞外金屋
藏渠也不堪今日席間誰認得舊時家令沈休文分明
蠟燭身相似纔上歡筵淚已零一生長羨金泥蝶顛向

釵邊與鏡邊皆饒風韻誦之感心嫵目迴腸蕩氣無題
三律云花繞迴廊曲繞梁暗中偏認杜蘭香登樓未定
銀翹顫避燭難禁鳳屐狂怕見月痕催月姊恰宜秋色
對秋孃持裙半刻留仙住纔隔紅簾便渺茫夜飲朝歌
晝未眠輕狂全是倚孃憐妮他細語挑鍼綾替我悲愁
肆管絃夜月不移歡枕畔春山長坐酒壚前何當黃玉
親磨墨立到琉璃硯匣邊怯上蘭舟細步來笑看波影
按金釵陳王着眼先羅襪溫尉關心到錦鞵把酒熨衣
容旋學摘花烹茗任頻差船孃爲近牕紗泊免踏前門

月露街

王清臣潁州人

附錄王貽上云天啓初潁川張遠度買田潁南地多
桃花林一日攜榼獨游見耕而歌者聽之所歌皆杜
詩也遂呼與語自言王姓清臣名舊有田畏徭役盡
委諸族爲人傭耕遠度過其廬見舊歷紙背以煤書
所作詩其述懷一篇云人生如泛梗飄飄殊無根飲
啄得幾許營營晨與昏對此春日好荷鋤出南原近
觀草色敷靜聽鳥語繁有身貴適意窮達安足論

張采字受先太倉州人崇禎戊辰進士除臨川知縣升補禮部主事

瓊東二張狎主復社盟書吉士身後詔求遺書通邑大都家守其學儀部名雖少遜然里門作志畱都議禮考文徵獻比於吉士功多

周鑣字仲馭金壇人崇禎戊辰進士授南京戶部主事轉禮部郎中削籍尋起禮部員外郎爲阮大鍼所殺有十四哀詩

仲馭以鈎黨受禍與雷僉事縝祚同繫請室於時御史

王懷阿阮大鍼意上疏請斬二人既而懷吉服承旨入
獄續祚謂仲馭曰王懷能斷我首邪答曰不斷我首吉
服何爲乃各作家書訖又互書先帝遺臣四字於腹遂
雉經死僉事遺命家人勿葬仿伍子胥抉目遺意置棺
雨花臺未浹月而留都不守矣方大鍼得志思盡殺東
林復社諸人及僧大悲獄起與張御史孫振謀倡十八
羅漢五十三參七十二菩薩之目希併諸異己者因馬
輔士英不欲而止士英有詩云蘇蕙才名千古絕陽臺
歌舞世無多若使當年不相妒也應快殺竇連波蓋以

靜志居詩話卷十九

十
荆溪山房

蕙擬劉副相宗周而以陽臺喻大鉞也

呂大器字先自遂寧人崇禎戊辰進士除行人歷
兵部左侍郎甲申以吏部左侍郎回里有集

呂公驅馳南北盡瘁行間五言如野寺依巖立官衙傍
水開孤燈寒殿壁落月映山城土瘠蟬吟屋林疎月上
扉野狐衝馬立山鬼伺人騎精衛悲銜土鷓鴣啼滿山
雲烟春尙在烽火晝相連淚盡銅駝棘歌殘玉樹花豈
無丹闕戀終抱白雲思忠孝之誠溢於言表

葛徵奇字無奇海寧人崇禎戊辰進士除中書舍

人選授湖廣道御史升太僕寺卿轉光祿卿有

蕪園集

光祿樂志林園又得閩人唱和格雖未高亦自超超拔
俗武林畱別吳梅里云昨喜逢初地蘭釭夜雨紅故人
相爾汝今日又西東楓落前山樹蘋開別墅風小牕涼
月靜客夢與誰同

萬壽祺字年少徐州人崇禎庚午舉人有隰西草
堂集

年少多才多藝詩亦清逸無斧目掀髯之狀入沛宮一

律云泗亭春盡樹婆娑漢帝宸游不再過魂魄有時還
至浦樓臺落日半臨河風吹大澤龍蛇近天入平沙雁
鶩多我亦遠隨黃綺去東山重唱采芝歌

徐柏齡字節之嘉興人崇禎庚午舉人署永嘉儒

學教諭

孝廉湖海播遷詩不猶人自出杼軸春日一律云風聲
起松末窈若萬壑深誰謂市井喧遂無天地心可惜天
桃花不言萎空林明年縱復開顏色不如今

張溥字天如太倉州人崇禎辛未進士改庶吉士

有七錄齋集

天如狎主復社以附東林聲應氣求龍集鳳會一言以
爲月旦四海重其人倫書晷刻而百函賓晝日以三接
由是青衿胄子白蠟明經登李元禮之門不啻虬戶爲
柳伯騫所識勝於筭金列郡人文一時風尚口談朝事
案置漢書頭包露額之巾足著踏跟之履和歌下里擁
鼻東川俄而哲人其萎踐康成之妖夢天子有詔求司
馬之遺書黨論日興清流釀禍周之夔彈之於始阮大
鍼厄之於終而邦國因之殄瘁矣

姜埰字如農，襄陽人。崇禎辛未進士，除密雲知縣。改儀真，入爲禮部主事。選授禮科給事中，以言事。廷杖削籍戍宣城，有敬亭集。

廷杖與東西廠錦衣衛鎮撫司獄用刑之酷，前代未有。自王振亂政，鞭撻朝士大臣，有枷項者，迨成化中汪直用事，廷杖臺省臣王濬、李俊等五十六人。正德間以諫南巡杖舒芬、黃鞏等百三十人，死者十一人。嘉靖初以爭大禮，哭左順門杖豐熙等百三十四人，死者十七人。此其最甚者矣。萬曆六年論首輔張居正奪情杖趙用。

賢沈思孝鄒元標等五人後定陵頗厭建言諸臣愈多
留中廷杖寢不用至天啓四年太監王體乾奉勅大審
復開其端重咎戚臣李承恩以悅魏忠賢於是主事萬
燦御史吳裕中相繼斃杖下而許顯純田爾畊輩煩刑
以逞備極慘毒楊左諸君子之禍有不忍言者矣思陵
卽降雪消見睨用獄稍平不意嘉魚熊公暨萊陽姜公
論列柄臣時日輻輳逆鱗旣觸天怒莫回拷掠之慘洵
九死而一生者蓋至柄臣自裁而兩公之荷戈終未見
釋姜公臨沒語其子安節實節曰敬亭吾處所也成者

吾君所命吾未聞後命而君亡吾猶罪人也死必埋吾
戍所乃葬宣城公晚歲始爲詩風格一本杜陵其自序
云託哀鳴於異鳥感音節於候蟲可謂善於喻物者也
赴戍宣州衛云垂死承恩譴天威咫尺間荷戈荒徼去
收骨瘴江還袞職猶思補龍顏竟絕攀橋陵千滴淚獨
在敬亭山

張鳳翥字儀明一字威赤宿松人崇禎辛未進士
除嘉興知縣補仁壽升刑部主事歷湖廣按察

副使

張公牽絲作宰以慈得民晚節禦侮危疆既盡襄陰
戰而死忠勇不可及也詩又安雅絕無叫囂之氣武陟
道中云孤城臨古渡斜日一舟橫北渚離人目西風遠
客程藤疎知樹冷櫂響信江平不用分漁火前洲月已
生

管正傳字元心長洲人崇禎辛未進士除永新知

縣調贛縣有積書巖詩草

元心詩思入微原本易林太元當其意匠經營幾欲效
修羅遁跡藕絲中然猶取材於古故方之徐元歎張草

臣諸子較勝一籌西泠橋一絕云斷嶺寒烟落晚鴉閒聽漁鼓傍橋過誰知湖上彎彎月又照錢塘蘇小家

王斥字王屋蘭陽人崇禎辛未進士滋陽知縣有

王王屋集

王屋嗜奇鞭驅險句觀其起學宗藩自理一疏辭艱晦而不舒在納言難以封進乃以未將金幣自尤尤人得毋過與

陳宗之字玉立長洲人崇禎癸酉舉人

啓禎間景陵流派盛行於吳中雖有林若撫力持唐調

然而捷敏未免率易玉立矜鍊獨操正始之音八門七
堰六十坊可以獨步病橋一律云病橋含辛實淒然墮
曉風本無雕飾分敢恨託根窮斷續陰依井低昂鳥啄
蟲可憐冰雪後剩有一枝紅周青士謂其蒼老工緻感
時一絕云花石網看良岳移麝香裙冷護宮衣紅燈小
隊湖游夜知否襄陽六載園

謝遴字彙先宜興人崇禎癸酉舉人有是亦漢存
橐

孝廉晦迹衡門種菜一畦不入城府陳檢討其年寄懷

詩云半畝牛宮繞菜田
鉏畦汲水獨悠然
芒屨一輛千金直
不踏城中二十年
其詩頗效林逋魏野銅官山書齋云坐卧深林裏
牕開別一天
山腰埋宿雨
石面瀉流泉
路盡雲猶觸
邨分樹尚連
烟霞吾所戀
只此可忘年

陶汝盈字仲調一字燮友長沙人崇禎癸酉舉人

有榮木堂集

先生壯歲好游自吳入越與先人訂僑札之分嘗留橋
李度歲晚際化離出監軍事捍禦鄉邦著力豎章堵雨
公盡瘁略同讀哀湖南賦悽吳過於蘭成詩雖未脫景

陵之派然覺爽氣殊倫嚴州道中云曲江流不盡寒氣
凜初嚴野泊紛漁艇遙帆類酒帘枯河冬雨活溼壁凍
雲黏不分多歸思蕭蕭與夢添

吳本泰字美子一字藥師仁和人崇禎甲戌進士

除行人選授吏部主事改南京禮部歷郎中有
海粟堂集秋舫箋北游西征東瞻南還嶽游諸

草

吏部當正聲微茫之日獨操大雅之音而揚乾風雅者
或不及焉益信曲高者和彌寡也寒食感事云南朔城

荒春到稀西山雪盡尙沾衣別來桃李三年夢老去兵
戈萬事非行脚出家猶有累低眉獻賦不如歸試看縣
上神林近野爨無烟空淚揮西湖竹枝詞云西湖湖水
碧琉璃西湖楊柳綠茸絲愛殺桃花紅片片却似西施
好面皮繆天白云此用唐人迴波樂詞不爲龕也與郎
暗約段橋西早起妝樓欲下梯宿雨半收晴不穩惱人
最是鶉鳩啼薺麥青青三月三看看草色暗湖南忙催
姊妹燒香去戴勝來時又養蠶放生池听柳叢叢香閣
鈴旛四面風輕薄少年乘醉過手提射鳴竹枝弓踏青

湖上嬾歸家更愛山行輦路賒
妾上笨車郎跨蹇西溪
十八里梅花

凌世韶字官球歙人崇禎甲戌進士除寧化知縣
謫江西按察司簡較改興化府經歷升處州府
推官入爲戶部主事有泖沙草

主事惠州西湖一絕云湖面寒光一鏡平
露荷烟草入秋清白鷗浴罷各飛去遙見潮痕郭外生

附錄陳皇士云泖沙廉吏晚棄家隱黃山詩有清韻
周之璵字玉鳧長洲人崇禎甲戌進士除刑部主

事歷禮部員外郎

玉鳧讀史感懷六十首援古驗今不失國風小雅之旨

今選其四云石羊埋棘漆燈具

一作

短犢橫牽上廢亭

金盃更從何處覓春深杜宇哭冬青漢皇恭儉百無營
衡石投籤久勵精端爲黼宸求治速翻教安石誤倉生
寶帶橫鞋建碧油居然鞦韆閣東牛未聞奏捷傳淝水
又見稱兵犯石頭參軍空自賦蕪城一歲人間草一青
隴首寒雲常漠漠風蒲依舊滿臨平

萬泰字履安鄞縣人崇禎丙子舉人有寒松齋橐

孝廉鈞黨顧廚士林圭臬兵後以經史分授諸子各名
一家其最著者斯大充宗斯同季野也詩多清商變徵
之音羊城旅懷等作見者十手傳鈔其云廣柳車中容
季布湘江澤畔問巫陽舟經彭澤竟客死舟中識者以
爲識云

張昉字于東一字匏客商邱人崇禎丙子舉人有

匏客遺詩

匏客多憂生之嗟其詩原出老杜晚行一律云客路寒
山暮居人各掩門荒城餘古驛落日滿前邨世亂家難

料身微命敢論烽煙回首處原野已黃昏武陵原云遠
害當年早深山共卜居家耕無賦地人讀未焚書父老
衣冠古兒孫禮法疎咸陽三月火不到野田廬

徐之瑞字蘭生臨安人崇禎丙子舉人有橫秋堂

稟

孝廉熟精文選五言古致紛敷近體效韓冬郎極其綺
靡春游詞云西山松柏翠成林十里橫塘水路深鷓鴣
鴛鴦莫相妒荷花香處結同心檀槽低攏小鸞青金鴈
斜飛玉手輕弟子三吳零落盡橋頭絃索最知名山頭

擊鼓賽金錢檣上飛鳥散舞筵長記迎神送神處石湖
沙觜泊郎船龍膏千炬繞芝楹銀鑰初收玉漏傾夜冷
不禁羅袖薄雙鬢炙火更吹笙

巢鳴盛字端明嘉興人崇禎丙子舉人有永思草

堂集

孝廉肥遯深林絕迹城市時羣盜四起鏐鐵銀鏤之器
無得留者於是遠屋種匏小大凡十餘種長如鶴頸纖
若蜂腰杯杓之外室中所需器皿莫非匏者遠邇爭做
之樵李匏樽不蹀而走海內孝廉作長歌咏焉茲錄其

五言一律云回也資瓢飲悠然見古風剖心香自發刮垢力須攻不識金銀氣何知陶冶工尼邱疏水意樂亦在其中剖心刮垢蓋自喻也

劉永錫字欽爾魏縣人崇禎丙子舉人選長洲儒學教諭署崇明縣事庭無畱獄有洹水遺詩

洹水至性之士兵後隱居相城有大吏強之仕袒裼疾視曰我中原男子年二十渡漳河登大伾躡馬鳴鞘兩河豪傑誰不知我奈何欲見辱邪取壁上所挂劒欲自剄門下士抱持之得解旣而女妻相繼餓死子爲盜所

傷亦死久之洹水沒其弟子徐景陳三島等經紀其喪
葬之虎邱山塘

曾異撰字弗人侯官人崇禎己卯舉人有紡授堂

集

弗人異才詩太近詭徑菴一律云天下何時定吾生忍
苟安乾坤難閉戶出處礙纓冠穀賤農偏餓機張女倍
寒追呼官縱急猶勝寇摧殘雨經富陽云小縣飛樓俯
驛亭竹間樹杪恣揚舫溪山病亦開篷看風雨眠猶剪
燭聽永夜潮來江上白浮嵐畫入井西青石尤前路無

妨阻好住嚴灘問客星

汪颯字魏美杭州人崇禎己卯舉人

孝廉高蹤苦節人所難堪予嘗訪之大佛寺僧寮竹榻
蘆簾不蔽風雪坐間欲畱予啜杯茗則瓦壚宿火已銷
一笑而別後數年偕魏處士允柵過予山樓書塾時已
初冬共宿樓上所攜布被尙未裝膝也間亦作詩多不
存彙僅錄一絕句云冰泮水還澄雲開月方潔一旦破
樊籠逍遙從此別竊謂明史局爲逸民立傳豈可失此

看

方以智字密之桐城人崇禎庚辰進士授翰林檢
討晚爲僧名宏智字無可別號藥地和尙有浮

山全集

先生紛綸五經融會百氏插三萬軸於架上羅四七宿
於胸中早推許郭之人倫晚結宗雷之淨社樂府古詩
磊落欽寄五律亦無浮響卓然名家哀哉行云奔城南
走城北礮聲轟轟天地黑女牆擐甲皆中官司馬上城
上不得亂傳敵樓鐵騎從至尊宮人夜出華林園須臾
中官大開東直門賊營四布如雲屯比時張牙禁出入

蓬首陋巷陰風泣居民畏死爭焚香父老衣衫暗沾溼
吁嗟乎先皇帝烈丈夫萬歲山前從者無神靈九廟長
悲呼却憶去年雷震奉先破寢室寶座赤蠓飛三日享
廟衛士夜驚鬼黑牛十丈端門出九卿大老無愁容金
紫得意長安中談兵獻策者仇寇只引舊例相朦朧日
夕甘泉烽火至沙河土關紛賊騎猶然閣試新門生品
第人情出名次傷心此輩送國家師生衣盍求清華一
旦薰蕕盡膏火崑岡玉石誰爭差可憐忼慨忠義士前
後只合橫尸死已焉哉哀勿哀仰天氣絕魂歸來小臣

拜祿十七石卻生此日當其災

姜垓字如須萊陽人崇禎庚辰進士除行人有貧

管集

如須官行人見解舍碑有阮大鍼姓名特疏請碎之重
書勒石思陵允之乃削去大鍼名徐昭法詩所云擊姦
穹碑碎是也甲申後避地吳門卒葬西山之竺塢詩篇
溫潤而恂栗葉處士襄序之

高承埏字寓公一字澤外嘉興人屯田郎道素子

崇禎庚辰進士知遷安寶坻涇三縣遷虞衡主

事有稽古堂集

先生表忠裏孝以父死不辜伏闕訟寃絲綸奪者載錫
三宰雷封名著循績而危邦墨守尤文吏所難能惜乎
功多不賞至今寶坻父老有遺憾焉家藏書八十櫃與
項氏萬卷樓爭富雖干戈俶擾不輟吟哦其病中述志
云惟將前進士慘澹表孤墳讀者比之澤畔行吟西臺
慟哭十八里橋云野外官橋斷溪邊緣綠樹層人家多酒
市風俗但魚罾問渡爭編竹聽歌雜采菱晚來風雨過
半溼夜船燈鴛鴦湖云兩湖秋水抱城斜縹緲樓臺帶

落霞日暮鴛鴦看不見
數聲風笛起蘆花
中秋詞云芙蓉墜露玉階涼
小院銀屏秋夜長
一曲清歌人不見
水晶簾外月如霜
溪上偶見云畫船風動茜裙低
兩兩紅妝照綠溪
驚起鴛鴦不成夢
一雙飛過蕩花西

單恂字質生松江華亭人崇禎庚辰進士麻城知

縣有白燕巷詩集

質生力埽陳言濃而不膩
桃花引云白鳥灘頭格格飛
罽船咿軋鱖魚肥
劉郎愛向桃花老
不遇神仙也不歸
春雨云杏花紅雪覆東牆
玉版初肥若下香
陡憶斷橋

清夜燭瀟瀟暮雨唱吳娘紅發棠梨花滿枝小樓寒食
雨絲絲白頭更度傷心節細簡冬郎蜀紙詩有贈云花
底相逢記隔春西牕剪燭夢還真鶯黃柳色鶯黃酒莫
負池塘月待人

張利民字能因侯官人崇禎庚辰進士除桐城知
縣擢戶科給事中晚披緇入山自稱田中和尚
有野衲詩略

先生牽絲之日值張獻忠來攻危同纍卵而以忠義激
勸將士執所佩刀殺白雞以血灑地曰諸公有二心者

彼視又折矢誓曰利民今日藉諸公力堅守有功不以
上聞者有如此矢將士咸感泣獻忠百計攻之不克賴
黃得功援師至城以獲全宰邑三年治行推天下第一
當其墨守無暇作詩詩多行遯後作情辭悽戾惜其未
醇

李公柱初名松晚更今名字子喬嘉善人崇禎庚
辰進士知歙縣事罷歸遂不復仕有澹齋草

子喬既遂初衣其詩澹蕩足釋煩憂假令吳清翁見之
定當贈羅一縑餉墨五笏春日一律云柴桑歸去興如

何老我谿山活計多白酒春寒逢社醉青蓑雨過答漁
歌儘容茅屋招新燕更鑿荷池浴乳鶯閒裏韶華元自
好願將餘歲伴烟蘿

徐孚遠字闇公松江華亭人崇禎壬午舉人

先生達齋侍郎之裔太師文貞公族孫與卧子彝仲勒
白輩六人倡幾社於雲間切磨古今文詞傾動海內旣
而乘桴遠引騎鶴重歸矢詩不多類有身世之感曉入
京口云獵獵風稍勁驚流伏枕聞晨鐘下巖際戍鼓列
江濱已辨南城樹新添北府軍亂離知未定淹泊對孤

雲

朱一 是字近修海寧人崇禎壬午舉人有爲可堂

集

附錄陸冰修云近修文名早擅逮避地江東屈志百里尤以才略見長歸欲披緇以老而從游弟子力強之說經因主文社太邱之交道日廣州來之縞紵彌多古今詩不事矜鍊而詞采斐然五言如十暑杜陵葛一寒范叔袍秋懸游子夢日落異鄉山野火燒山近寒星照水明山容初過雨水氣忽生秋淚以傷時

盡愁須醉日多僧厨三度臘客夢一歸鄉翦竹開深
徑因溪架小橋青山寒照日黃葉晚從風遠水通溝
濁濃陰接樹平妻子他鄉淚文章浩劫灰七言如牧
馬官同張萬歲進賢賞竝鄂千秋關河秋色三千里
風雨冬青十二陵代北重關飛白鴈京西古鎮出黃
花笛裏羌歌憐折柳馬頭關樹但生榆長江險失韓
擒虎智井春埋張麗華三楚烽塵新幕府六朝烟雨
舊樓臺瀑布秋風搖練影石梁新雨糝藤花皆首響
清鏘猶是歷下四溟敵手 張白方云近修東南俊

及詩派亦足領袖後來若過淮陰釣臺作云功成百
戰歸真主計失三齊乞假王擲地有聲不作儒響

包捷字驚幾吳江人崇禎壬午舉人有西山集

先輩避地穹窿灌園自給而交誼真摯哭孫孝廉兆奎
于內橋收吳進士易體于湖上讀其韻語淋漓慨慷唾
壺之口幾缺弔方正學祠云正學祠荒野草榮門前惟
見大江橫革除青史人長在飛渡金川路未明自有麻
衣慙叔父難將草詔重先生從今家事誰堪說更爲文

皇痛北平

徐枋字昭法吳縣人崇禎壬午舉人有俟齋集

孝廉高蹈者吳越居多始終裹足不入城府者吾郡李
潛夫巢端明及吳中徐昭法此外不槩見昭法沒最晚
以名尤重江左得其詩畫不啻珊瑚鈎也食園茄云園
芋虬生自好微物入盤餐錦里芋相似青門瓜共繁嘗新
霜夏實垂露摘秋原遙憶霜風裏根株何處存

譚貞良字元孩嘉興人崇禎癸未以五經中進士
有狷石居遺藁

先生書破萬卷以五經成進士重繭山海正命不渝大

節皎然一世余之姑作配先生猶憶弱齡就塾先生之
堂先生與姑視予猶子嘗謬題以國士乃今瓠落無容
不副先生之品目錄先生遺詩不禁清淚闌干也樓桑
先主廟云系出中山近名從小沛聞卜鄰占李定望氣
得周羣象叶黃龍瑞符仍赤帝文全家頻脫險一旅忽
能軍名士收諸葛英雄獨使君志寧摧百戰力已限三
分淚盡髀生肉魂歸棧入雲枯桑遺廟折野火斷碑然
繫馬臨風至題詩塞日曛粉榆存舊社絃管尙紛紛題
圮橋授履圖云千金散盡已無餘圮上蕭條授履初法

吏空煩偶語律不知黃石解傳書

余增遠字爾德一字謙貞會稽人崇禎癸未進士

除寶應知縣

明府遯世躬耕故人有官監司者屏車從訪之與室人
避入帷帳中故人畱白金投贈明府麾之門外終不得
見庶幾合乎鑿坏踰垣之風焉送杜子歸楚云春風春
水太無情有客無家問去程黃鵠磯頭斜照下斷腸玉
笛武昌城

周齊曾字唯一鄞縣人崇禎癸未進士除廣州順

德知縣有囊雲詩草

唯一挂冠歸里耕巖飲谷入山惟恐不深其爲詩恥雷同故言不必中倫慮恒以硬語盤空幾於幽獨君語人雖大怪之不顧也贈呂叟云自得中林趣蕭然水石間過橋重聽瀑入寺乃尋山雖與羣動接不殊獨坐閒年來勤穡事晴雨頗相關

張若羲字昊東松江華亭人崇禎癸未進士

昊東爲余中表兄甲申以後潛身家巷躬自灌園余嘗訪之郊西適荷鋤帶笠相揖於紫瓜白苧之間破屋數

書九言 卷一 二
三
椽下一榻以留吳處士騏暇相酬和詩思清厲有亮節
而無懦響擬太白登謝朓北樓云孤城一眺望平楚正
萋萋春穀流泉暗陵陽落日低寒雲隨宿雁暮靄失前
溪坐嘯懷人遠狂歌度水西

吳惟英字國華襲恭順侯爵有墨響齋集

國華累葉珥貂風流獨擅崇禎中與鞏都尉永固竝留
心圖史與諸朝士極文酒讌游之樂家有墨響齋摹拓
金石文字裝池插架不減歐薛洪趙之富孫舍人國敕
采其詩入燕都游覽志甚多其後都中大疫國華死爲

冥官時降於室龔尙書孝升曹侍郎潔躬每述其遺事
以爲可載鬼董狐西湖長堤一律云斜日長堤迴村煙
接帝京路從溪外轉人在樹中行野草石橋短沙鷗春
水輕回看游賞地晴色萬山明

茅元儀字止生歸安人崇禎初以薦授翰林院待
詔尋參孫承宗軍務改授副總兵官守覺華島
旋以兵譁論戍有西崦又峴諸集

止生宣力戎行富有撰述其論詩云今人與古人欲合
當先離其言誠是特下筆未能醇雅蓋竟陵之派方盛

又與友夏衿契宜其染素爲緇矣

葛一龍字震甫吳縣人由貢生選授雲南布政司

理問有尺木齋等集

包山林麓之勝甲於三吳而詩人產斯土者前有蔡孔
口後有葛理問一時均有盛名讀其全集未免有楓落
吳江之憾麻城劉同人序之比於反舌無聲之日鵲旦
不鳴之夜是亦微辭也繼震甫起者有顧子超

史能仁河南鹿邑舉人崇禎中知濟南新城縣事

調淄川遷兵部主事

新城示百姓五古一首云上天降甘露徧地生羊肚飢
食羊肚菜渴飲甘露乳涕泣告吾民慎勿去鄉土可謂
仁人之言溥吉人之辭寡

附錄王貽上云史公清正而才剛柔互用來爲縣令
庚辰辛巳歲大稷人多流亡時邑境甘露降地生羊
肚菜公賦詩以示百姓至今人誦之

文震亨字啓美長洲人崇禎中官武英殿中書舍
人有文生小草

啓美相君介弟名桂黨人之籍後以善琴供奉思陵跡

其生平於閩則周章甫爲賦長歌於皖則阮集之爲作
詩序王尙書覺斯有言湛持憂讒畏譏而啓美浮沉金
馬吟咏徜徉世無嫉者由其處世間有道焉當時以善
琴同入供奉者有太常寺丞雲南楊懷玉會稽伊爾燧
柳色一律云點染憑誰力東風著意吹自無攀折恨猶
較淺深時金粉銷難盡樓臺遠更宜卷簾愁少婦望遠
更成絲徐電發評云樓臺遠更宜一語非工於畫者不
能道

張世偉字異度吳縣人萬歷壬子舉順天鄉試尋

以賢良方正薦不就崇禎甲申贈翰林待詔有

自廣齋集

異度藉甚詩名庸庸絕少高調居園卽事云墻東堪避
世新卜野人居巷隘難旋馬池寬好種魚閒情雲澹處
爽氣露零初但解蓬蒿趣窮愁可著書

歸昌世字文休崑山人崇禎末以待詔徵不應有

假菴詩草

歸熙甫長於筆而短於詩讀季思文休作覺後來者勝
秋懷二首云壁蛩收殘音哀蟬振餘響圖書盈座隅覽

古歎其往揚子千載知鍾期並時賞窮通非巧拙徒爲
增頰仰不雨竹猶響未露草先溼齋空覺風來石暝如
人立旅客有歸夢柝驚夜何急舉酒酌桂叢言旋會將
及旅懷云亦有嵇康癖偏宜謝奕狂酒中遺往事夢裏
失他鄉野曠雲開樹窗明月在牀扁舟生計好最苦夜
猿長

劉孔和字節之長山人大學士鴻訓子有日損堂

詩集

節之豪士當寇陷京師破產結客起兵長白山中有衆

三千人執僞縣令徇於軍旋聞王師破賊乃率衆南下
駐軍河北以兵屬劉澤清澤清武人不知書既爲藩鎮
強作韻語示坐客節之慷慨言曰國家舉淮東千里付
足下未聞北面發一矢而沾沾言詩詩工何益國事矧
未必工邪澤清大恚推案起坐客皆震懾節之不爲動
拂衣徐出澤清立遣壯士二十輩追及舟中拉殺之時
年三十一爾福藩遙授副總兵官節之已死三日矣其
詩好排硬語大約以孟郊邵謁爲宗傷心吟云一日百
痛哭天地不我容永隨光景夜願先萬物冬釀愁爲醇

蘇鑄憂爲劒鋒味漓刃亦摧憂愁無終窮

黃翼聖字子羽太倉州人崇禎中辟授新都知縣

升安吉知州有蓮蕊居士詩選

賊兵臨新都崇禎庚辰十二月事也先是十月張獻忠渡昭河薄成都在城中將士登陴以守遠近人民皆避難奔赴苗莠粟糝襍莫辨從祖君永公諱大定通判成都請以蜀王所發米五百石爲粥以食餓者且潛察其蹤跡有可疑者以術羈縻之全活數萬計羣疑亦釋俄而寇猝至圍城公與布政使侯安國分守北門當賊衆

來路於時文武將吏皆膽落公見城下一賊衣朱衣騎
馬巡軍用強弩射之中其胄錚然有聲謂安國曰賊雖
多未及整可擊而走也乃同參將鄒鳴率壯士八十人
出戰殺三人俘二人奪馬十疋入見巡按御史陳良謨
提二賊頭顱血濡纓漉堂上御史大驚離席曰別駕相
門子乃能殺賊可敬也是夜賊退屯柳溝浦去城二十
里而遙事定御史上戰功止及煮粥活民之勞而已此
事長編野史俱不載錄子羽寇警襍詩附記之詩云聖
主勤焦勞盪寇屬元老專闖旣歷年捷書苦弗早餘氛

難遽消川峽復擾擾掠食日漸深鄰境多不保顧瞻斗
 大城捍禦悉草草伶仃茨簷下何處出牙爪殘毒既已
 酷憤厲忽矯矯白面山澤臞擁之建旗旒殫力答衆心
 身名總非寶荒縣數十家十年再罹厄嗟此鋒鏑餘寇
 耗復孔亟孤城寡所援羣計在竄匿顧惟封疆義招撫
 竭心盡割糈募壯士八口不遑惜大義一再伸呼一應
 者百人心自有良如鐵附磁石刑牛告穹蒼下令明勸
 激毋或貳乃心毋或靳乃力天則有雷霆吏則有斬馘
 妻孥甘共危僮客盡持戟以身爲衆先相期見勞績兵

氣動荒野黃雲黯城隅名義所共激羸民皆壯夫長鎗
襍大棒角技繁有徒披氈當堅甲揭裙爲旌旗結聚各
以類約束仍弗疎危樓圯雉間氣燄光四衢苦口相戒
命各各念前車官民同賞僇殺賊勿踟躕村居襍興云
廿四番風取次來梅花落盡杏花開畫梁無數空巢在
社雨蕭蕭燕未回休誇紅紫鬪芳菲開到荼蘼春已非
恥逐游蜂與舞蝶別尋一徑綠陰歸閒花無數爛空庭
別有黃金綴決明一自杜陵矜惜後秋風秋雨獨關情
附錄陳言夏云先生弱冠時尚鍾譚之學已而宦游

簿書牒訴干戈戎馬之間發之於詩激昂磅礴無非忠君愛國勤勞王事之語迨棄官歸里杜門謝客其詩哀而不傷怨而不亂有小雅之遺

蔣臣初名姬允字子卿更今名字一个桐城人崇禎中舉賢良尋授戶部主事

一个早見知於太倉二張注名復社其後柴車北上爲倪公玉汝所薦召對平臺甲申寇變間道走淮陽依史公道鄰史公畱參軍務一个歎曰以一騶虞將五狼其能久乎遂辭歸其詩雖乏渾涵亦自蕭散

王廷宰字昆翁號鹿柴松江華亭人補嘉興縣學
生以貢任六安儒學教諭遷沅江知縣有緯蕭

齋集

鹿柴先生占籍嘉興注名鴛水詩社乙酉之春過余外
舅馮翁小飲余陪末坐忽問曰曾學詩否對曰未也先
生乃言曰詩有一學而能者有終身學之而不能者洵
有別才焉余問學詩何從曰試作對句酒至先生舉古
人名俾屬對偶記憶顧野王對沈田子鄭虎臣對沈麟
士蔡興宗對崔慰祖蕭子雲對任伯雨魏知古對顏相

時吉中孚對溫大有楊完者對晁補之杜審言對蕭想
話貢師泰對齊履謙任蠻奴對張惡子金安上對鄭居
中劉辰翁對逢丑父韓擇木對李栖筠蔡有鄰對徐無
黨王巖叟對阮佃夫李思齊對石作蜀柳三變對張九
成鄭櫻桃對郭芍藥王僧綽對馬仙琕秘彭祖對庾黔
婁劉方平對徐圓朗劉仁本對范道根先生見余應對
之不窮也語馮翁曰此將來必以詩名世其取材博矣
自遭喪亂不復見先生并不復見先生之詩僅從社草
中錄其一二回思知己之言是亦蒙之李益王翰也鄭

園云世酒嫖清夜西園鴛華轂素月升澄景微露泣佳
木灼灼芙蓉姿臨波漾輕縠四顧命賓朋灑藻競豐緝
感彼蟋蟀篇勞生何局促鼎鼎百年內歡樂苦不足列
坐進芳醴彈箏弄織曲霓旌遶層阿鳳吹流深谷遨遊
及良時庶以快所欲

徐時勉字克勤蘇州嘉定人崇禎庚辰以貢生特
用知澄城縣事有蘧菴東歸橐

崇禎庚辰思陵留意人材俾下第舉人及廷試貢士俱
畱特用悉畀以民社之任於是舉人史惇以下一百六

十三人貢士吳康侯以下一百人許同進士出身惇等請援例謁文廟行釋菜禮并立石太學題名閣臣張四知持不可思陵特允惇所請大學士周延儒奉勅撰文太僕寺少卿兼翰林院侍書朱國詔奉勅書丹篆額工部營繕司郎中王灝監刻立石於西南隅蓋自萬歷丙辰錢士升榜至魏藻德榜九科有題名而無記及是始有記焉特用榜死事者戶部郎中金壇徐有聲兵部員外郎升貴州安平道副使臨川曾益金滄道參議寶雞楊畏知開封知府武進蔡鳳黃州府同知弋陽王府輔

國中尉朱統鋤郊縣知縣贈河南按察副使安邑李貞
佐汾陽知縣西安山陽劉必達大同山陰知縣慶陽衛
李偉葢昌安定知縣臨海應昌士四川興文知縣漢陽
艾吾鼎呈貢知縣鍾祥黃卷立賢無方未嘗不收國士
之報克勤復社耆宿注名特用榜中與陳孝廉瑚歸處
士莊敦高尚之節亦不媿是科者惇金壇人官至九江
太守野史撰勸餘襍紀者卽其人也

邱上儀字維正武進人由武科進士官海鹽衛遊
擊經亂隱居紫雲山

維正武人恂恂若文士雅歌高會酒酣間一賦詩其居
官甚廉或告之曰將者知信仁勇嚴不聞以廉取一介
亦何傷維正笑弗答也晚躬耕紫雲山麓有盜劫行舟
維正殼弩射之百步外中其目盜乃遁舟人造謝不見
又嘗負薪三百斤行山中汎兵欲奪之盡爲所縛兵乞
哀縱之去麓山祝眉老集隱君子十四人計其齒盈千
齡目曰千齡社維正與焉席上詩成以維正爲擅場云
詩云孤邨冒雨墊綸巾一櫂衝寒破水淪自是素心堪
共侶好將末俗使還淳藏身曾學姚平仲招隱誰呼祁

孔賓良會詎應誇競病舉杯且盡甕頭春

嚴焯字伯玉常熟人文靖公訥之孫有滄浪集麈

山草

伯玉始爲祁陽王客繼人何雲從瞿起田幕中晚移家

隱粵西獮人洞其妾鄒淑芳字曰蕙祺吳江人能詩從

伯玉人楚轉徙蒼梧年二十四而天有詩百五十首題

曰三生石草句如洗手自憐十指甲何因又長兩三分

玉簫舊譜回文句瑤瑟新絃續命絲趙瑟欲調無奈嬾

楚腰先細不堪愁皆婉約可誦至生日詩云笑采秋花

斟壽酒還愁薄命不禁霜則成讖矣淑芳詩病革自焚
此伯玉所記憶者淑芳墓在端州伯玉省母曾一還里
門晚仍入獮人洞不知所終

申嶺芳字孝觀太師時行之孫承蔭中書科中書

舍八有元閒閣詩草

舍人山中樂四時皆有之而夏日一首有醇無疵詩云
山中之樂樂何如莫樂朱明孟夏初竹長雞頭新粉落
籬編麕眼晚花疎提壺勸酒村村鳥積雪纒絲處處車
鼓愛田田小荷葉呼童量水種紅魚

汪珂玉字玉水徽州人僑居嘉興崇禎中官山東

鹽運使判官

玉水不卑小官留心著述所輯珊瑚網一編與吳下張
青父品題並駕惜五詩草甚富泯焉無存題孟蜀宮妓
圖云芙蓉城裏試仙衣詩酒留連坐式微莫恨李家降
表熟君玉原愛著朝緋

陳濟生字皇士長洲人官太僕寺丞

皇士經亂歸田緝啓禎兩朝遺詩又命工傳寫明三百
年來忠臣義士象裝以爲冊可稱好事矣惜其詩鏤板

未終而象亦爲蠹魚所蝕覽觀者惜焉秋山和貫休韻
云秋來祇是入山宜坐到泉聲幽咽時清淚欲零誰許
見峰頭惟有老猿知

陳洪綬字章侯諸暨人國子監生

章侯四齡就婦翁家見新聖壁登案畫漢前將軍關侯
象長八九尺翁見下拜遂以室奉侯蓋繪事本天縱也
崇禎間與北平崔青蚰齊名號南陳北崔中年縱酒狎
妓自放客有求畫者罄折至恭勿與及酒邊召妓輒自
索筆墨雖小夫穉子徵索無弗應晚混迹服僧衣自稱

老遲亦稱悔遲亦稱老蓮有妾吳淨鬢亦善花草錢塘
馮秀才硯祥詩云吳興公子工花草侍制丹青步絕塵
三百年來陳待詔鉛殺粉繼前人余每觀其真蹟所
畫美女姚冶絕倫今則贗本紛紛多係其徒嚴水子山
子司馬子雨輩所做率皆遽條賊施矣詩頗饒逸致惜
流傳者寡贈妓董飛仙一絕云桃花馬上董飛仙自擘
生綃乞畫蓮好事日多還記得庚申三月岳墳前亡友
海鹽教諭金燾所誦也

黃孔昭字含美吳縣人舉崇禎癸酉鄉試選授大

姚知縣有石衣翁南歸草

含美一命投荒化離天末已不作歸田之夢其子向堅
端木有懷二人眼枯足繭蹈白刃尋之卒御以全歸吳
中好事者編爲傳奇演之春秋之社南歸草一卷成於
愴怛俶擾之中無暇持擇觀其紀述恒有野史所未詳
者若夏呈貢之死事是已夏諱祖訓字仲有秀水學生
以歲貢除知呈貢縣事含美稱其起義師失利一城屠
戮殆盡知縣被刑最慘則余鄉黨多未之聞含美有詩
哀之此宜亟發其幽光者也夏君與先太傅鍾秀坊舊

宅望衡而居入門一徑繞至水榭余童子時從先子造君獲聞講論盡義書卷恍然在目鄰有死封疆之臣耄矣讀含美詩始克知之附疏其略庶後世有述焉

朱茂時字子葵萬歷中補秀水縣學生承蔭官至貴陽知府有成春堂遺藁

城南放鶴洲相傳爲唐相裴休別業名曰裴島然考新舊唐書俱不言休流寓吳下至元嘉禾志宏正間儀真柳玟府志萊陽于鳳喈補志亦未之載或曰南渡初禮部郎中朱敦儒營之以爲墅洲名其所題雖不見地志

觀樵歌一編多在吾鄉所作此說近是世父拓地百畝
 白湖之田有堂有亭有橋有船有岡有榭有庖有漏襍
 樹花果瓜疇芋區菜圃廢所不具陳少詹懿典爲作記
 董尙書其昌爲書扁李少卿日華爲寫圖後先觴咏者
 題壁淋漓今則大樹飄零高臺蕪沒止存卧柳斷橋而
 已黔中曲云疊嶂曾無三尺平盤江狹處鐵橋橫短裙
 窄袖花蠻女宛在鞦韆索上行地無三尺平黔中諺也
盤江鐵索橋行者動搖
 而蠻女不懼 土風不改古牂牁銅鼓迎神躡足歌一種黔南
 水西鬼黑羅羅笑白羅羅白羅羅北黑羅羅高髻纏髮一
羅更剽險難制

尺長淺藍褰子趁時妝一春遠信難難卜暗祝心期拜

竹王

黔女挽髻襟以馬
鬃褰尚淺藍色

朱茂昭字子藻天啓初補秀水縣學生承蔭官都

察院照磨

先叔行第三柳下和光長卿善病營宅於真如寺西夾
岸紫藤萬條寒玉當春梅放不減鄧尉西溪四方名彥
爭過爲文字之飲去世父鶴洲不遠游者比之何家大
小山楊明府龍友見寄山水畫扇并訂遊吳以詩代答
云楊君黔州客愛寫吳下山沙中羣雁起天末孤雲還

橘柚經冬樹楊梅銷夏灣扁舟何日共吹笛到吳關范
長倩云全詩清越

靜志居詩話卷十九